

Headlines

- पहलगाम आतंकी हमले मगरा प्रतिक्रिया दे तौर पर कीता जा'रदी कारवाइएँ दे सिलसिले गी जारी रखदे होई भारत नै पाकिस्तानी समुंद्री जहाज दे भारतीय बंदरगाह च दाखल होने जा इत्थुआं जाने पर पाबंदी लाई दित्ती ऐ।
- मुख्यमंत्री उमर अब्दुल्ला होरें प्रधानमंत्री नरेन्द्र मोदी हुंदे कन्नै मलाटी करियै जम्मू कश्मीर सरबंधी बक्ख-बक्ख मामलें पर गल्लबात कीती।
- नवम्बर 2024 च श्रीनगर ग्रनेड हमले कन्नै सरबंधी मामले च एनआईए नै बंधश लग्गे दे आतंकवादी संगठन आईएसआईएस कन्नै जुड़े दे त्रै आरोपिणं खलाफ चार्जशीट दाखल कीती।
- केन्द्रीय राज्य मंत्री डॉ. जितेन्द्र सिंह होरें रामबन च लास पस्सियां पौने दी खदशा आले इलाकें दा व्यापक सर्वे करने दियां हिदायतां दित्तियां। बनिहाल रु तौले गै मौसम दी अगेत्री जानकारी आला सरिस्ता होग।
- श्रीनगर थमां अज्ज 178 श्रद्धालुएं दा पैह्ला जत्था हज्ज लेई रवाना होग।

<><><><><><>

Pak Ship Ban(byte)

पहलगाम आतंकी हमले दे बाद प्रतिक्रिया दे तौरा पर कीती जा'रदिएं कारवाइएँ दे सिलसिले गी जारी रखदे होई भारत नै पाकिस्तानी समुंद्री जहाजें दे भारतीय बंदगाहें च दाखल होने जा इत्थुआं जाने पर बंदश लाई दित्ती ऐ। एह फैसला भारतीय संपत्ति, समेयान ते सरबंधत ढांचे दी सुरक्षा गी जकीनी बनाने लेई लैता गेआ ऐ। जहाजरानी सरबंधी महानिदेशालय दा आखना ऐ जे एह रोक अगले हुक्मै तोड़ी जारी रौहग ते जित्थें कुतै एहदे च छूट देने दी लोड़ नेई कीती जाग, तां मामले दी गंभीरता गी दिखदे होई दित्ती बी जाई सकदी ऐ। एहदे इलावा भारत नै पाकिस्तान कन्नै जियां जे पैहले बी खबर दित्ती जाई चुकी दी ऐ, डाक सेवा ते आयात पर बी बंदश लाई दित्ती दी ऐ। केन्द्र सरकार दे इस फैसले दा मुख्य भरै च सुआगत ते समर्थन कीता जा'रदा ऐ। जम्मू दे बपारिएं बी इस फैसले दी सराहना कीती ऐ ते आखेआ ऐ जे बन्ने पारा चलाए जा'रदे आतंकवाद खलाफ एह कारवाई इक जरूरी गैह ऐ। बपारिएं दा आखना ऐ जे देसे दी सुरक्षा कोला उप्पर कोई कारोबार, बपार दा फायदा नुक्सान नेई होई सकदा। आकाशवाणी समाचार कन्नै गल्ल करदे होई इक बपारी नै आखेआ.....बाईट

<><><><><><>

CM-PM Meet

मुख्यमंत्री उमर अब्दुल्ला होर कल संजा नमीं दिल्ली च प्रधानमंत्री नरेन्द्र मोदी ाहोरें गी जाइयै मिले ते उंदे नै जम्मू कश्मीर सरबंधी बक्ख-बक्ख मुद्दें पर गल्लबात कीती ते टकोहदा करियै उत्थें हाल दे किश घटनाक्रम दी पछोकड़े च बचार बटांदरा कीता। उमर अब्दुल्ला होरें 22 अप्रैल गी बैसरन घाटी पहलगाम च होए दे आतंकवादी हमले, जेहदे च 26एं जनें दी मौत होई गेई ही, दे बाद दे हालात बारे जानकारी प्रधानमंत्री हुंदे कन्नै सांझी कीती। मुख्यमंत्री होरें दस्सेआ जे उस वारदात गी लेइयै लोकें दे मनै च बड़ा मता रौह रौस्सा ते दुख ऐ। उनें प्रधानमंत्री होरें गी जम्मू कश्मीर विधानसभा च पहलगाम आतंकी हमले गी लेइयै कीती गेदी जोरदार निंदेया ते पास कीते गेदे प्रस्ताह दे बारे च बी जानकारी दित्ती ते दस्सेआ जे जम्मू कश्मीर दे लोक किस चाल्ली आतंकवाद गी भलेयां नकारने ते रमानदारी ते भाई चारे गी जींदा रखने दा पक्का निश्चा करी लैते दा ऐ।

<><><><><><>

NIA Chargesheet

राष्ट्रीय जांच अजेंसी एनआईए नै बंधश लग्गे दे आतंकी संगठन आईएसआईएस ते आईएसजेके कन्नै जुड़े दे ते नवम्बर 2024 दे श्रीनगर ग्रनेड हमले जेहदे च इक महिला दी मौत होई गेई ही ते केई नागरिक घायल होई गे हे, दे त्रै आरोपिएं

खलाफ चार्जशीट दाखल कीती ऐ। जम्मू च एनआईए दी विशेष अदालतै च दाखल इस आरोप पत्र च गैर कनूनी गतिविधिएं पर रोक सरबंधी कनून तैह्त् जिने त्रऊं अरोपिएं खलाफ चार्जशीट दाखल कीती गई ऐ, उंदे च शेख उसामा यासीन, उमर फयाज शेख ते अफनान मंसूी नाइक शामिल न। एह त्रवै एल्ले न्यायिक हिरासतै च न। एह ग्रनेड हमला 3 नवम्बर गी श्रीनगर दे इक बजारै च होआ हा जेह्दा मकसद इलाके दी रमानदारी च खलल पाइयै उत्थें डर—त्राह आला म्होल पैदा करना हा। एह्दे नै जुड़े दे पूरे आतंकी नेटवर्क बारे पता लाने लेई जाने दी प्रक्रिया अजें बी जारी ऐ।

<><><><><><>

LoC Firing

भारती सेना नै कल रातीं कब्जा रेखा पर पाकिस्तानी सेना आस्सेआ कीती गेदी गोलीबारी दा असरदार तरीके कन्नै परता दित्ता। रक्षा सूत्रें दस्सेआ जे पाकिस्तानी सेना नै केन्द्र शासत जम्मू कश्मीर दे कुपवाड़ा, बारामुला, पुंछ, राजौरी, मेंढर, नौशरा, सुदरबनी ते अखनूर सेक्टरें च कब्जा रेखा पर बिजन कुसै उकसावे दे लौहके थेआरें कन्नै गोलीबारी कीती जेह्दा भारती सेना नै पूरी तगड़ेयाई कन्नै बनकदा परता दित्ता।

<><><><><><>

1IGP Jammu Review

सुरक्षा इंतजाम दा जायजा लैने लेई जम्मू जोन दे आइजीपी भीम सेन टूटी होरें राश्ट्रीय जरनैली शिड़क ते गंगेयाल, साबां, कठुआ, लखनपुर ते होरने थाहरें दा जायजा लैता। इस दरान उनें जन सुरक्षा गी बधाने पर ध्यान केन्द्रित कीता। उनें बलें दी तैनाती बधाने, सीसीटीवी निगरानी, अजेंसिएं बश्कार तालमेल बधाने पर जोर पाया। उनें सारे अधिकारिएं गी हिदायत कीती जे ओह सौहगे ते सतर्क रौहन। कुसै बी माड़ी घटना कन्नै निबड़ने लेई पैहले थमां एतिहाती तरीकाकार अपनाई रखन।

<><><><><><>

MoS Ramban(byte)

रामबन जिले च हाल च आई दी कुदरती आपदा गी दिक्खदे होई केन्द्रीय राज्य मंत्री डॉ. जितेन्द्र सिंह होरें इनें चीजें कन्नै निबड़ने लेई साइंसी ढंगे सिंर तैआरिएं पर जोर पाया। प्रशासन नै सिविल सोसाइटी दी उच्च स्तर दी सांझी बैठक दरान उनें रामबन दी उनें थाहरें जित्थें लास पस्सियां पौने दा खतरा बने दा रौह्दा ऐ, दा व्यापक सर्वे करोआने लेई गलाया। बनिहाल च मौसम दी अगेत्री जानकारी देने आला सरिस्ता ते राह्त ते पूर्णबहाली आले कम्में लेई एमपी फंड दा इस्तेमाल बारे उनें गल्ल कीती। मीडिया कर्मिएं कन्नै गल्ल करदे होई उनें आखेआ.....बाईट

<><><><><><>

Haj Pilgrims

जम्मू कश्मीर थमां इस ब'रे दी हज यात्रा पर जा'रदे श्रद्धालुएं दा पैहला जत्था अज्ज बडलै 10 बजे श्रीनगर अंतर्राश्ट्रीय ब्हाइ अड्डे परा खाना होग। आकाशवाणी दे जम्मू संवाददाता नै जानकारी दित्ती ऐ जे यात्रा दे पैहले जत्थे च कुल 178 श्रद्धालु जा'रदे न, जिंदे च 96 मर्द ते 82 महिला यात्री शामिल न। जम्मू कश्मीर हज कमेटी मूजब इस ब'रे सरकारी कोटे तैह्त् जम्मू कश्मीर थमां कोई 36 ज्हार कोला मते श्रद्धालु हज यात्रा पर जा करदे न।

<><><><><><>

Waves Last Day(Music)

हुन खबरां वेक्स समिट दी मुंबई च जारी वर्ल्ड आडियो विजुअल एंटरटेनमेंट समिट वेक्स 2025 दा अज्ज समापन होग। खीरी ध्याड़े फिल्म निर्माण पर किश सत्र होंगन ते सांस्कृतिक कार्यक्रम होंगन। 4 दिन दे इस सम्मेलन दा उद्घाटन प्रधानमंत्री नरेन्द्र मोदी होरें वीरवारें कीता हा। इस शिखर सम्मेलन दा विशेषार —कनैक्टीविटी, क्रियटरस, कनैक्टीविटी कंट्रीज़। एह आयोजन भारत दी मीडिया, मनोरंजन ते डिजीटल नवाचार दे वैश्विक केन्द्र दे तौर पर कायम करने दा जतन ऐ। आयोजन च 90 थमां मते मुल्खें 10 ज्हार थमां मते प्रतिनिधि हिस्सा लै'रदे न।

<><><><><><>

Bjarat Darshan(byte)

राष्ट्रनिर्माण दे इक हिस्से दे तौर पर डोडा—भद्रवाह थमां समाज दे कमजोर वर्ग कन्नै सरबंधी 30 बच्चें गी भारत दर्शन टूर पर भेजेआ गेआ हा, जेहदे हुन परतोई आए न। एहदा सरिस्ता सीआरपीएफ दी 33 बटालियन आस्सेआ कीता गेआ। अपने इस शैक्षणिक दौरे दरान इनें बच्चें मुख्ये दे केई सारी ऐतिहासक ते सांस्कृतिक महत्वै आली थाहरें दा दौरा लाया। अपने अनुभव सांझा करदे होई विद्यार्थिएं इस दौरे गी उंदे महत्व बेहतर ते जानने समझने आला इक मौका दस्सेआ। उने एहदे लेई सीआरपीएफ दा धन्नबाद कीता। उनें आखेआ.....बाईट

<><><><><><>

Gyanpath-Design

स्वतंत्रता दिवस समारोह 2025 दे हिस्से दे तौरा पर रक्षा मंत्रालय आसेआ MyGov दे सहयोग कन्नै पैहली थमां 15 मई तगर ज्ञानपथ दे डिजाइन लेई प्रतियोगिता दा आयोजन कीता जा'रदा ऐ। एहदा मकसद युवाएं ते जनता च देशभक्ति दी भावना गी बल देना ऐ। प्रतिभागियें गी लाल किले च एनसीसी कैडेटें, एनएसएस दे स्वयंसेविएं ते स्कूलें दे बच्चें आसेआ बनाए जाने आहले फार्मेशनें गी डिजाइन करना होग। पैहले त्रौनें जेत्तुएं गी 10 ज्हार रपे जिसले के पहले 250 प्रतिभागियें गी ई निमंत्रण पत्र थोग तां जे ओह अपने इक साथी कन्नै इस समारोह दे साक्षी बनी सकन। डिजाइनें गी MyGov दे दिशा—निर्देशें दी पालमा करनी होग।

<><><><><><>